

Na osnovu člana 81. Zakona o srednjem obrazovanju („Službeni glasnik Unsko-sanskog kantona“ broj: 17/12). ministar Ministarstva obrazovanja, nauke, kulture i sporta donosi

**PRAVILNIK
S KRITERIJIMA ZA UPIS UČENIKA/CA U PRVI RAZRED SREDNJE ŠKOLE
U UNSKO-SANSKOM KANTONU**

I OPĆE ODREDBE

**Član 1.
(Predmet Pravilnika)**

Ovim Pravilnikom se utvrđuju zajednički, posebni i dodatni kriteriji za upis učenika/ca u prvi razred srednjih škola u Unsko-sanskom kantonu.

**Član 2.
(Upis učenika/ca)**

U prvi razred srednje škole upisuju se učenici/e koji/e su završili/e osnovno obrazovanje, a unutar planiranog broja upisnih mjesta.

**Član 3.
(Jednaki uvjeti za upis)**

Pod jednakim uvjetima u srednje škole upisuju se državljani/ke Bosne i Hercegovine, te djeca koja nisu državljani Bosne i Hercegovine.

**Član 4.
(Pravo upisa)**

(1) Pravo upisa u prvi razred srednjih škola imaju učenici/e sa završenom osnovnom školom, koji/e nisu stariji/e od 18 godina.

(2) U prvi razred srednje škole za djecu sa teškoćama u razvoju, odnosno posebna odjeljenja srednje škole i u redovna odjeljenja, pravo upisa imaju učenici/e koji/e nisu stariji/e od 22 godine.

**Član 5.
(Plan upisa)**

(1) U prvi razred srednjih škola učenici/e se upisuju u skladu sa planom upisa učenika/ca koji odlukom odobrava ministar/ica Ministarstva obrazovanja, nauke, kulture i sporta (u daljnjem tekstu ministar/ica).

(2) Plan upisa učenika/ca donosi školski odbor škole, na prijedlog direktora/ice škole najkasnije do 30. marta tekuće godine.

**Član 6.
(Komisija za upis)**

(1) Upis učenika/ca provodi posebna komisija koju imenuje školski odbor škole.

(2) Rang listu svih učenika/ca i spisak primljenih učenika/ca škole su dužne objaviti na oglasnoj ploči nakon što ih verificira školski odbor škole, najkasnije sedam dana od dana zatvaranja konkursa.

(3) Izbor učenika/ca vrši se na osnovu ovih kriterija koji su obavezno sastavni dio konkursa za upis učenika/ca u prvi razred srednjih škola.

Član 7.
(Konkurs za upis)

(1) Konkurs za upis učenika/ca u prvi razred srednjih škola objavljuje Ministarstvo obrazovanja, nauke, kulture i sporta (u daljnjem tekstu Ministarstvo) putem medija.

(2) U slučaju da u konkursnom roku iz prethodnog slava neke škole ne popune planirana mjesta. Ministarstvo raspisuje naknadni konkurs, najmanje 20 dana prije početka školske godine.

(3) Škole su dužne dostaviti podatke za naknadni konkurs Ministarstvu najkasnije do 1. jula tekuće godine.

**II ZAJEDNIČKI KRITERIJI I POSTUPCI UPISA U GIMNAZIJE,
TEHNIČKE I SRODNE ŠKOLE I STRUČNE ŠKOLE**

Član 8.
(Zajednički kriteriji)

(1) Za upis u prvi razred srednje škole prijavljenim učenicima/ama vrednuju se i boduju:

- a) postignuti opći uspjeh u prethodnom obrazovanju u posljednja dva razreda osnovnog obrazovanja, izražen na dvije decimale za svaki razred posebno
- b) za upis u gimnazijske programe vrednuje se postignuti uspjeh u posljednja dva razreda osnovnog obrazovanja iz bosanskog, hrvatskog, srpskog jezika i književnosti, matematike, stranog jezika, hemije i historije
- c) za upis u programe obrazovanja za stjecanje stručne kvalifikacije u trajanju od četiri godine i programe obrazovanja za stjecanje stručne kvalifikacije u trajanju od tri godine, vrednuje se postignuti uspjeh u posljednja dva razreda osnovnoga obrazovanja iz nastavnih predmeta navedenih u tabeli:

Vrsta škole	PREDMETI
Ekonomska	Bosanski, hrvatski, srpski jezik i književnost Strani jezik Matematika Historija Informatika
Drvoprerađivačka	Bosanski, hrvatski, srpski jezik i književnost Strani jezik Matematika Fizika Tehnički odgoj
Ugostiteljsko-turistička	Bosanski, hrvatski, srpski jezik i književnost Strani jezik Matematika Geografija Informatika
Elektrotehnička	Bosanski, hrvatski, srpski jezik i književnost Strani jezik Matematika Fizika Informatika
Građevinska	Bosanski, hrvatski, srpski jezik i književnost Strani jezik Matematika Fizika Tehnički odgoj

Hemijsko-tehnološka	Bosanski, hrvatski, srpski jezik i književnost Strani jezik Matematika Fizika Hemija
Medicinska	Bosanski, hrvatski, srpski jezik i književnost Strani jezik Matematika Hemija Biologija
Mašinska	Bosanski, hrvatski, srpski jezik i književnost Strani jezik Matematika Fizika Informatika
Poljoprivredna-prehrambena	Bosanski, hrvatski, srpski jezik i književnost Strani jezik Matematika Hemija Biologija
Saobraćajna	Bosanski, hrvatski, srpski jezik i književnost Strani jezik Matematika Fizika Informatika
Šumarska	Bosanski, hrvatski, srpski jezik i književnost Strani jezik Matematika Hemija Biologija
Tekstilna	Bosanski, hrvatski, srpski jezik i književnost Strani jezik Matematika Fizika Hemija
Veterinarska	Bosanski, hrvatski, srpski jezik i književnost Strani jezik Matematika Hemija Biologija

d) ocjena iz vladanja „primjerno“ u posljednja dva razreda osnovnog obrazovanja

e) sposobnosti i darovitosti

(2) Vrednovanje uspjeha učenika/ca koji su osnovno obrazovanje završili u inozemstvu, provest će komisija primjenjujući elemente vrednovanja iz stava 1. ovog člana.

(3) U slučaju da učeniku/ci iz stava (2) ovog člana u svjedodžbama/knjižici za posljednje dvije godine osnovnog obrazovanja nije upisana ocjena iz nekoga od predmeta koji je značajan za upis, za utvrđivanje broja bodova iz tog predmeta koristi se prosječna ocjena općeg uspjeha u posljednja dva razreda osnovnog obrazovanja.

(4) Učeniku/ci koji/a je u osnovnoj školi učio/la dva ili više stranih jezika, vrednuje se bolja ocjena iz stranog jezika.

(5) Ako su dva/dvije ili više učenika/ca po svim osnovama vrednovanja, ostvarila/e jednak broj bodova, odluku o prednosti pri upisu učenika/ce donosi komisija škole, na osnovu prosjeka općeg uspjeha posljednja dva razreda osnovnog obrazovanja izraženiji na dvije decimale, o čemu se izrađuje zapisnik.

Član 9.

(Sposobnosti i darovitosti kao kriteriji za upis)

Sposobnosti i darovitosti učenika/ca dokazuju se i vrednuju:

- a) na osnovi provjere (ispitivanja) specifičnih sposobnosti
- b) na osnovi izuzetnih rezultata u prethodnom obrazovanju u područjima važnim za izabranu vrstu programa
- c) na osnovi rezultata takmičenja učenika u znanju, vještinama i sposobnostima koja se provode u organizaciji Pedagoškog zavoda, te rezultata međunarodnih takmičenja
- d) na osnovi rezultata školskih sportskih takmičenja za osnovne škole

III UVJETI ZA UPIS U UMJETNIČKE (LIKOVNE I MUZIČKE) ŠKOLE I UPIS UČENIKA/CA SPORTAŠA

Član 10.

(Programi likovne umjetnosti)

(1) U programe likovne umjetnosti upisuju se učenici/e koji/e iz općeg uspjeha u posljednja dva razreda osnovnog obrazovanja i ocjena iz bosanskog, hrvatskog, srpskog jezika i književnosti, matematike, stranog jezika, likovne i muzičke kulture u posljednja dva razreda osnovnog obrazovanja, ostvare najmanje 30 bodova i zadovolje na provjeri darovitosti za likovno izražavanje.

(2) Iznimka je iz stava (1) ovog člana je dokazana posebna darovitost postizanjem maksimalnog broja bodova iz posebne provjere darovitosti.

Član 11.

(Provjera darovitosti za likovno izražavanje)

(1) Dokazana darovitost za likovno izražavanje provjerava se:

- a) crtanjem olovkom ili ugljenom
- b) slikanjem (tempera, gvaš ili akvarel)

(2) Provjerom darovitosti iz stava (1) ovog člana moguće je ostvariti najviše 60 bodova, dok se u programe likovne umjetnosti ne mogu upisati učenici/ce koji na provjeri darovitosti nisu ostvarili najmanje 35 bodova.

(3) Konačna rang lista učenika/ca utvrđuje se sabiranjem bodova dobijenih provjerom likovnih sposobnosti, općega uspjeha i ocjena postignuća iz nastavnih predmeta.

(4) Ako dva/dvije ili više učenika/ca imaju isti ukupan broj bodova, upisuje se onaj/ona učenik/ca koji/a je ostvario/la veći broj bodova iz provjere likovne darovitosti.

Član 12.

(Programi muzičke umjetnosti)

(1) Učenici/e koji su uspješno završili/e osnovno muzičko obrazovanje upisuju se u prvi razred četverogodišnjega srednjeg muzičkog programa.

(2) Učenici/ama se vrednuje:

- a) opći uspjeh iz posljednja četiri razreda muzičke škole
- b) rezultat na prijemnom ispitu
- c) primjerno vladanje u muzičkoj školi

(3) Prijemni ispit za instrumentaliste i pjevače obuhvata provjeru iz temeljnog predmeta struke i solfeggia, a za teoretičara provjeru iz klavira i solfeggia.

(4) Ako dva/dvije ili više učenika/ce imaju isti ukupan broj bodova, upisuje se onaj/ona učenik/ca koji/a je ostvario/la veći broj bodova na prijemnom ispitu.

(5) Učenici/e koji nisu pohađali osnovnu muzičku školu upisuju se nakon prijemnog ispita s ispitom sluha, muzičkog pamćenja i ritma.

(6) U programe muzičke umjetnosti upisuju se učenici/e iz stava 5 ovog člana koji/e iz općega uspjeha u posljednja dva razreda osnovnog obrazovanja i ocjena iz bosanskog, hrvatskog, srpskog jezika i književnosti, matematike, stranog jezika, likovne i muzičke kulture u posljednja dva razreda osnovnog obrazovanja, ostvare najmanje 30 bodova.

Član 13. **(Provjera darovitosti)**

(1) Umjetničke (likovne i muzičke) škole mogu provesti provjeru darovitosti zainteresiranih učenika/ca koji/koje još nisu završili/le završni razred osnovnog obrazovanja.

(2) Provjeru darovitosti škola je dužna javno oglasiti i navesti rokove i mjesto ispitivanja na način da budu dostupni svim zainteresiranim učenicima/ama.

(3) Ukupni rezultat i rang lista utvrđuju se u rokovima propisanim odlukom o upisu učenika/ca.

Član 14. **(Upis učenika/ca sportaša)**

Pravo direktnog upisa u srednje škole imaju učenici/e sportaši koji/e na osnovi kriterija iz člana 8. (1) ovog Pravilnika ostvare minimalni bodovni prag za upis u gimnazije, odnosno druge vrste srednjih škola, te prilože potvrdu odgovarajućeg sportskog saveza o sportskom postignuću na državnom nivou.

IV VREDNOVANJE POSEBNIH REZULTATA U PRETHODNOM OBRAZOVANJU

Član 15. **(Učenici/ce generacije)**

Učenici/e generacije upisuju se bez bodovanja.

Član 16. **(Vrednovanje ocjene iz vladanja u prethodnomu obrazovanju)**

Ocjena „primjerno“ iz vladanja u posljednja dva razreda osnovnog obrazovanja učeniku/ci se vrednuje s ukupno 1 bodom.

V VREDNOVANJE REZULTATA POSTIGNUTIH NA TAKMIČENJIMA ZNANJA I VJEŠTINA

Član 17. **(Vrednovanje rezultata takmičenja)**

(1) Pravo na dodatne bodove ostvaruju učenici/e na osnovi rezultata koje su postigli na takmičenjima iz predmeta posebno značajnih za upis u posljednju dva razreda osnovnog obrazovanja koje organizira Pedagoški zavod, te rezultata međunarodnih takmičenja, i to:

Vrsta takmičenja	Opis	Broj bodova
Državna ili međunarodna takmičenja	Osvojeno prvo mjesto kao pojedinci ili članovi grupe	4
	Osvojeno drugo mjesto kao pojedinci ili članovi grupe	3
	Osvojeno treće mjesto kao pojedinci ili članovi grupe	2
Kantonalna takmičenja	Osvojeno prvo mjesto kao pojedinci ili članovi grupe	1
	Osvojeno drugo mjesto kao pojedinci ili članovi grupe	0,5
	Osvojeno treće mjesto kao pojedinci ili članovi grupe	0,3

Takmičenja iz likovne kulture (u školama u kojima je likovna kultura jedan od predmeta i elemenata posebno važnih za upis)	Osvojeno prvo mjesto na državnom takmičenju ili kao najbolji likovni rad na kantonalnoj smotri	1
	Osvojeno drugo mjesto na državnom takmičenju ili kao najbolji likovni rad na kantonalnoj smotri	0,5
	Osvojeno treće mjesto na državnom takmičenju ili kao najbolji likovni rad na kantonalnoj smotri	0,3

(2) Dokaz o ostvarenom rezultatu na međunarodnom ili državnom takmičenju izdaje organizator tog takmičenja.

(3) Uvjerenje ili diplomu o ostvarenom rezultatu na kantonalnom takmičenju u kojima su uz podatke o takmičenju i vrsti takmičenja, navedeni i podaci o osvojenom mjestu na takmičenju pojedinaca ili grupa s navedenim brojem članova grupe izdaje Pedagoški zavod.

(4) Učeniku/ci, koji/a je učestvovao/la na više takmičenja ili na takmičenjima iz više područja, vrsta ili nivoa, navedenih u stavu (1) ovog člana vrednuje se samo jedan (najpovoljniji) rezultat.

VI VREDNOVANJE REZULTATA POSTIGNUTIH NA SPORTSKIM TAKMIČENJIMA

Član 18.

(Vrednovanje rezultata postignutih na sportskim takmičenjima)

(1) Učenicima/ama se vrednuju rezultati koje su postigli u posljednja dva razreda osnovnog obrazovanja na sportskim takmičenjima koja je organizirao Pedagoški zavod i sportski savez.

Vrsta takmičenja	Opis	Broj bodova
	Učenici/ce koji su na državnom ili međunarodnom takmičenju kao članovi ekipe ili pojedinci osvojili prvo mjesto	4
	Učenici/ce koji su na državnom ili međunarodnom takmičenju kao članovi ekipe ili pojedinci osvojili drugo mjesto	3
	Učenici/ce koji su na državnom ili međunarodnom takmičenju kao članovi ekipe ili pojedinci osvojili treće mjesto	2
	Učenici/ce koji su kao članovi ekipe ili pojedinci osvojili prvo mjesto na kantonalnom takmičenju	1
	Učenici/ce koji su kao članovi ekipe ili pojedinci osvojili drugo mjesto na kantonalnom takmičenju	0,5
	Učenici/ce koji su kao članovi ekipe ili pojedinci osvojili treće mjesto na kantonalnom takmičenju	0,3

(2) Pravo na dodatne bodove učenici/e dokazuju odgovarajućim uvjerenjem.

(3) Za sportska takmičenja koja nisu u stavu (1) ovog člana, uvjeti za ostvarivanje dodatnih bodova za osvojeno prvo, drugo i treće mjesto na međunarodnom, državnom i kantonalnom takmičenju je potvrda organizatora takmičenja.

VII VREDNOVANJE OSTALIH IZUZETNIH REZULTATA IZ PRETHODNOG OBRAZOVANJA

Član 19.

(Vrednovanje ostalih izuzetnih rezultata iz prethodnog obrazovanja)

(1) Učenicima/ama se vrednuju i ostali izuzetni rezultati iz prethodnog obrazovanja, ukoliko su:

- a) istovremeno završili osnovnu školu i osnovnu muzičku školu s 2 dodatna boda za upis u bilo koji od obrazovnih programa

(2) Pravo na dodatne bodove iz stava 1. tačke a) učenik/ca dokazuje razrednim svjedodžbama muzičke škole.

(3) Učenici/ce koji su sve razrede osnovne škole završili prosječnom ocjenom 5,00 dobivaju 10 bodova.

(4) Dokaz iz stava (3) ovog člana je uvjerenje škole o prosječnoj ocjeni.

VIII UČENICI/E S TEŠKOĆAMA U RAZVOJU

Član 20.

(Učenici/e s teškoćama u razvoju)

- (1) Učenici/e s teškoćama u razvoju su učenici/e čije su teškoće u razvoju utvrđene u postupku vještačenja u sistemu socijalne zaštite ili su osnovnu školu završili na osnovi prilagođenog nastavnog plana i programa.
- (2) Učenici/e s teškoćama u razvoju ima pravo direktnog upisa.
- (3) Za ostvarenje prava direktnog upisa, uz ostale upisne dokumente, učenik/ca obavezno prilaže:
 - a) potvrdu o primjerenom obliku školovanja u osnovnoj školi
 - b) mišljenje stručne službe osnovne škole o sposobnostima i motivaciji učenika za najmanje dva programa obrazovanja
 - c) iznimno, ako je osnovnu školu završio/la bez utvrđenoga oblika školovanja, umjesto potvrde iz stava (1) ovog člana učenik/ca prilaže nalaz i mišljenje, odnosno rješenje nadležnog centra za socijalni rad o pravima iz socijalne zaštite.
- (4) Učenici/e koji su osnovno obrazovanje završili po redovnom nastavnom planu i programu uz individualizirani pristup, kao i učenici/ce koji/e su osnovno obrazovanje završili po redovnom prilagođenom nastavnom planu i programu, mogu nastaviti školovanje:
 - a) po redovnom nastavnom planu i programu srednjega obrazovanja s individualiziranim pristupom
 - b) po redovnom prilagođenom nastavnom planu i programu srednjeg obrazovanja
- (5) Učenici/e koji/c su osnovno obrazovanje završili po posebnom nastavnom planu i programu nastavljaju srednje obrazovanje u posebnim programima u srednjim školama ili posebnim odgojno-obrazovnim ustanovama, odnosno ustanovama socijalne zaštite koje imaju odobrenje za provođenje srednjoškolskih programa za učenike/ce s teškoćama u razvoju.
- (6) O posebnostima upisa koje se ne mogu riješiti u školi, u skladu sa stavom (5) ovog člana, odlučuje Ministarstvo.

IX UPIS UČENIKA ROMA , UPIS U SKLADU S POLITIKOM RAVNOPRAVNOSTI SPOLOVA I UPIS U SKLADU SA ZAKONOM O DOPUNSKIM PRAVIMA BRANILACA I ČLANOVA NJIHOVIH PORODICA

Član 21.

(Upis učenika/ca Roma)

- (1) Učeniku/ci koji/a je pripadnik/ca romske nacionalne manjine, dodaju se 2 boda na broj bodova koji je utvrđen tokom postupka vrednovanja. S tako utvrđenim brojem bodova škola rangira kandidata/kinju na rang listi.
- (2) O posebnostima upisa koje se ne mogu riješiti u školi, odlučuje Ministarstvo.

Član 22.

(Upis učenika/ca u skladu s politikom ravnopravnosti spolova)

- (1) Ukoliko je za upis u određenu stručnu kvalifikaciju prijavljeno 80% ili više pripadnika istog spola, učeniku/ci suprotnoga spola dodaju se 2 boda na broj bodova koji je utvrđen tokom postupka vrednovanja.
- (2) Učenika/ću iz stava (1) ovog člana s tako utvrđenim brojem bodova, škola rangira na ukupnoj rang listi.

Član 23.
**(Upis učenika na osnovi Zakona o dopunskim pravima branilaca i
Zakona o socijalnoj zaštiti civilnih žrtava rata)**

(1) Djeca osoba koje ostvaruju prava iz Zakona o dopunskim pravima branilaca i članova njihovih porodica („Službeni glasnik Unsko-sanskog kantona“, broj: 3/05. 1/09 i 29/12) i djeca na koju se odnosi Zakon o socijalnoj zaštiti civilnih žrtava rata („Službeni glasnik Unsko-sanskog kantona“, broj: 5/00 i 7/01) podjednakim uvjetima imaju prednost prilikom upisa.

(2) Za ostvarivanje prava iz stava (1) ovog član učenik/ca je, uz prijavnicu za upis, dužan/na priložiti odgovarajuće rješenje nadležnog organa.

X UTVRĐIVANJE UKUPNOG REZULTATA

Član 24.
(Utvrdjivanje ukupnog rezultata)

(1) Ukupan rezultat učenika/ca utvrđuje se na osnovu broja bodova koje je učenik/ca stekao/la po svim osnovama vrednovanja.

(2) Na osnovi ukupnoga rezultata škola utvrđuje rang listu učenika/ca za upis i objavljuje je na školskoj oglasnoj ploči i na web stranicama škole.

(3) Rang lista mora sadržavati broj bodova po svim osnovama vrednovanja.

(4) Kandidati/kandidatkinje imaju pravo žalbe školskom odboru.

(5) Školski odbor je dužan dostaviti žalbu na mišljenje Ministarstvu.

(6) Mišljenje Ministarstva je obavezujuće.

(7) Po dobijenom mišljenju Ministarstva, školski odbor donosi konačnu odluku.

XI MINIMALNI BODOVNI PRAG

Član 25.
(Minimalni bodovni prag)

(1) Minimalni broj bodova za upis u škole koje izvode programe obrazovanja u četverogodišnjem trajanju, ne može biti manji od:

- a) 42 boda za upis u gimnazije
- b) 38 bodova za upis u četverogodišnje srednje škole koje provode programe obrazovanja za porodice zanimanja: zdravstvo, ekonomija, pravo, administracija i trgovina
- c) 34 boda za upis u ostale programe obrazovanja u trajanju od četiri godine

(2) Za programe obrazovanja za stjecanje stručne kvalifikacije i programe obrazovanja za vezane obrte u trajanju od tri godine, te za programe obrazovanja koji traju manje od tri godine, a najmanje godinu dana ne utvrđuje se minimalni broj bodova koji su potrebni za upis.

XII POSTUPCI

Član 26.
(Postupci)

(1) Konkurs za upis u srednje škole objavit će se najkasnije do 20.06. tekuće godine i to objedinjeno za cijeli Unsko-sanski kanton.

(2) Konkurs za upis treba sadržavati sljedeće podatke: rokove za upis, broj upisnih mjesta za pojedino zanimanje/program, spisak potrebnih dokumenata za upis i druge uvjete upisu koji se utvrđuju u skladu sa ovim Pravilnikom.

(3) Rokovi prijave za upis, postupak upisa i upis određuju se u skladu s Odlukom o upisu koju donosi ministar.

(4) Učenik/ca koji/a se prijavljuje za upis u školu s više zanimanja/programa obrazovanja u prijavi obavezno prijavljuje prvi/prvo zanimanje/program obrazovanja u koji se želi upisati, te drugi/drugo i treći/treće zanimanje/program obrazovanja u koji se želi upisati, ako mu škola ne može osigurati upis u prvi/prvo zanimanje/program obrazovanja.

(5) Ako se ne može uvažiti želja učenika/ce za prvi izbor zanimanja/programa, učeniku/ci će se ponuditi upis u zanimanje/program za koji se alternativnu prijavio/la u postupku upisa.

Član 27. (Postupak prijave)

(1) U postupku prijave za upis kandidatkinja prilaže:

- a) prijavu na konkurs (obrazac prijave bit će objavljen na web stranicama Ministarstva ili škole)
- b) svjedodžbe posljednja dva razreda osnovnog obrazovanja
- c) odgovarajuće dokumente kojima dokazuje neko od prava koje ima na osnovu odredbi ovog Pravilnika

(2) U postupku prijavljivanja za upis uz prijavu na konkurs, učenik/ca može priložiti i kopije dokumenata, osim svjedodžbi koje se predaju u originalu.

(3) Prijava na konkurs i upisnica oslobođene su plaćanja taksi.

(4) Škola je dužna na oglasnoj ploči i na web stranicama Škole (prema mogućnostima) objavljivati sve važnije informacije o upisu.

XIII PROGRAMI OBRAZOVANJA ZA STJECANJE STRUČNE KVALIFIKACIJE U TRAJANJU MANJEM OD TRI GODINE, A NAJMANJE GODINU DANA

Član 28. (Programi obrazovanja za stjecanje stručne kvalifikacije u trajanju manjem od tri godine, a najmanje godinu dana)

Rang lista učenika/ca koji su se prijavili za upis u prvi razred srednje škole po programu za stjecanje stručne kvalifikacije u trajanju manjem od tri godine, a najmanje godinu dana utvrđuje se na osnovi općeg uspjeha učenika/ca iz posljednja dva razreda osnovnoga obrazovanja.

XIV PRIJELAZNE I ZAVRŠNE ODREDBE

Član 29.

Ovaj Pravilnik stupa na snagu danom donošenja, a objavit će se u „Službenom glasniku Unsko-sanskog kantona“.

Član 30.

Stupanjem na snagu ovog Pravilnika prestaje važiti Pravilnik o sadržaju i načinu polaganja prijemnog ispita u gimnaziji, umjetničkoj školi, i tehničkoj i srodnoj školi („Službeni glasnik Unsko-sanskog kantona“, broj: 4/02).

Broj: 10-02-3122-1/13

Bihać, 20.03.2013.

MINISTAR

Dario Jurić, prof.